

**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINA KAKANJ  
Općinsko vijeće**

**Broj:** 01/1-18-Z/22

**Kakanj,** 31.05.2022. godine

**Z A P I S N I K**

**sa 18. redovne sjednice Općinskog vijeća održane 31.05.2022. godine (utorak)  
u sali Općinskog vijeća sa početkom u 9:00 sati  
(sažetak zapisnika)**

Nakon intoniranja himne Bosne i Hercegovine 18. sjednicu Općinskog vijeća otvorio je Slaven Katičić, predsjedavajući Općinskog vijeća i pozdravio prisutne.

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Edin Aliefendić, Safet Šahman, Mejrema Purišević, Mediha Mamela, Omer Musić, Nerma Aliefendić, Elvir Delibašić, Izudin Hrusto, Džemal Bečirhodžić (**naknadno pristupio**) i Namir Talić (**naknadno pristupio**) (**SDA**)

Vinka Aletović, Ahmed Begić i Miroslav Spasojević (**SDP BiH**)

Mirsad Tursum, Zerina Kovač, Fakir Ajdinović i Sabit Čehajić (**S BiH**)

Dževdet Huskić, Behija Kulović i Branko Češljčić (**NS**)

Mugdin Gorak i Enver Merdić (**naknadno pristupio**) (**SBB BiH**)

Adnan Čobo i Armin Bašić (**DF**)

Slaven Katičić (**HDZ BiH**)

Mujo Fafulić - **nacionalnih manjina**

**Odsutni vijećnici:** Nedim Mušija, Izudin Puščul i Aldin Šljivo (**SDA**), Eldin Mijoč (**SDP BiH**)

Predsjedavajući je konstatovao da je na sjednici u momentu prijave prisutno 23 vijećnika i vijećnica, te da su se stekli svi potrebni uslovi za validan rad i odlučivanje Općinskog vijeća.

Pored vijećnika sjednici su prisustvovali:

**Mirnes Bajtarević**, općinski načelnik

**Ferdo Mijač**, sekretar Općinskog vijeća

**Džihad Berbić**, pomoćnik općinskog načelnika za finansije

**Mirza Fazlić**, pomoćnik općinskog načelnika za privredu, urbanizam i zaštitu okoline

**Nurudin Hrusto**, pomoćnik općinskog načelnika za civilnu zaštitu

**Bahrudin Arnaut**, pomoćnik općinskog načelnika za opću upravu radne i zajedničke poslove, lokalnu samoupravu i mjesne zajednice

**Alem Škulj**, ispred Službe za imovinskopravne, geodetske poslove i katastar nekretnina

**Zijad Neimarlija**, direktor Zavoda za planiranje i izgradnju općine Kakanj

**Mahir Sikira**, savjetnik općinskog načelnika

### **Izviestioci, obrađivači, gosti:**

Vesna Ajanović, općinska pravobraniteljica  
Muamer Čelebić, direktor JP „Grijanje“ d.o.o. Kakanj  
Haris Veispahić, direktor JP „Vodokom“ d.o.o. Kakanj  
Mirsada Čaluk, predsjednica UO JU za predškolski odgoj i obrazovanje „Mladost“  
Helmina Murtić, direktorica JU za predškolski odgoj i obrazovanje „Mladost“  
Nihad Tukić, predsjednik UO JU „Kulturno-sportski centar“ Kakanj  
Mirza Mušija, direktor JU „Kulturno-sportski centar“ Kakanj  
Samir Husika, član UO JU Centar za socijalni rad Kakanj  
Fadil Merdić, koordinator Općinskog razvojnog tima

### **Predstavnici medija:**

**NTV IC Kakanj**  
**Radio Kakanj**  
**Kakanj Info**

### **Napomene o radu Kolegija Općinskog vijeća:**

U pripremi 18. redovne sjednice Općinskoga vijeća, Kolegij Općinskog vijeća je 23.05.2022. godine, održao sjednicu na kojoj je razmatrao predstavke i ostale materijale koji su bili proslijeđeni na Kolegij i to:

#### **a) Razmatranje Obavijesti „Mega travel“ d.o.o. Kakanj**

Kolegij Općinskog vijeća je Obavijest „Mega travel“ d.o.o. Kakanj prosljeđio općinskom načelniku i Službi za privredu, urbanizam i zaštitu okoline na dalje razmatranje i postupanje.

#### **b) Izveštaj Komisije za Etički kodeks po Zaključku Kolegija Općinskog vijeća broj: 01/1-16-K-132/22 od 21.04.2022. godine**

Kolegij Općinskog vijeća je Izveštaj Komisije za Etički kodeks po Zaključku Kolegija Općinskog vijeća 01/1-16-K-132/22 od 21.04.2022. godine, prima k znanju i isti prosljeđio OSCE-u na uvid.

#### **c) Urgencija Udruženja AARHUS Centar u BiH**

Kolegij Općinskog vijeća je Urgenciju Udruženja AARHUS Centar u BiH prosljeđio općinskom načelniku i Službi za privredu, urbanizam i zaštitu okoline na dalje razmatranje i postupanje.

#### **d) Zahtjev „Hidrogradnje“ d.d. Sarajevo u stečaju**

Kako je predmetni Zahtjev već upućen općinskom načelniku i nadležnoj službi, Kolegij je isti primio k znanju.

### **Usvajanje zapisnika sa 17. redovne sjednice Općinskog vijeća:**

Nije bilo primjedbi na zapisnik sa 17. redovne sjednice Općinskog vijeća i isti je usvojen jednoglasno sa 22 glasa ZA.

### **Komentari na dostavljene odgovore na vijećnička pitanja:**

**Vinka Aletović:** se zahvalila na odgovoru na pitanje u vezi obezbjeđivanja mehanizama za pravovremeno dostavljanje odgovora na postavljena vijećnička pitanja i podnesene inicijative. Kazala je da u odgovoru stoji da se redovno dostavljaju odgovori na decidno postavljena pitanja i da se insistira kod rukovodilaca općinskih službi da se redovno i pravovremeno reaguje na postavljena pitanja i inicijative. Smatra da dostavljanje redovno odgovora nije bila dosadašnja praksa, te je naglasila da njen apitanja nisu bila provokativna, odnosno sve što je pitala bilo je na insistiranje građana, birača koji su to od nje tražili. Na kraju je dodala da svaka inicijativa koja se realizuje nije samo poen za nju lično, niti klub SDP-a, nego za kompletnu političku strukturu, a sve u cilju dobrobiti svih građana općine.

### **Komentari na dostavljena mišljenja na vijećničke inicijative:**

**Dževdet Huskić:** je rekao da nije imao dovoljno vremena za pripremu obzirom da je tri odgovora na postavljena pitanja i inicijative dobio neposredno pred sjednicu. Osvrnuo se na odgovor Zavoda u vezi inicijative za izgradnju stepenica prema firmi Vilona i naselju Dragiči i rekao da se u odgovoru spominje

pješaćka staza prema Centrotransu koju on nije imao i vidu, odnosno nije mislio na nju kad je podnio inicijativu. Ponovo je naglasio da je mislio na stepenice koje su bile pored pošte i koje su vodile prema Dragićima, a koje su uklonjene prilikom izgradnje nove saobraćajnice, te je rekao da mještani traže da se iste ponovo izgrade na istom mjestu ili u neposrednoj blizini, a sve u sklopu radova na izgradnji nove saobraćajnice.

### **Vijećnička pitanja:**

**Behija Kulović:** je postavila dva vijećnička pitanja. Prvo pitanje je šta je uzrok neugodnog mirisa (smrada) koji se u posljednjih nekoliko dana osjeti najviše na području MZ Doboje, ali i u drugim dijelovima koji gravitiraju području oko TC Kakanj, zbog čega je boravak napolju, posebno u predvečernjim, noćnim i jutarnjim satima, gotovo nemoguć? Drugo pitanje je kakav je odnos i obaveza Općine prema vlasnicima zemljišta koje je proglašeno zelenom zonom bez pravovremenog obavještenja, čime je zabranjena gradnja objekata na tom području, te da li se može po zahtjevu mijenjati namjena zemljišta ili će Općina izvršiti eksproprijaciju zemljišta i isplatu vlasnicima i u kojem vremenskom periodu se to može očekivati? Konkretno misleći na parcele na području naselja Malješ.

**Dževdet Huskić:** je postavio dva vijećnička pitanja. Prvo pitanje je koja je precizna specifikacija utrošenih sredstava za ugradnju podzemnih kontejnera, nadogradnju starih i nabavku novih kamiona za pražnjenje ovih kontejnera, obzirom da se iz odgovora Vodokoma i Službe za privredu, na ranije postavljeno pitanje na istu tematiku, može uočiti razlika u iznosima utrošenih sredstava u visini oko 370 hiljada KM? Drugo pitanje je da li je neko iz Općine razgovarao sa stanarima zgrada i stambene kuće na kružnom toku koji su direktno ugroženi bukom, vibracijama i građevinskim radovima na novoj saobraćajnici i da li se pokušala dobiti saglasnost ili makar verbalna podrška za izvođenje radova na izgradnji pomenute ceste, posebno ako se ima u vidu da je kuća Subotića tokom posljednjih kiša poplavljena zbog aktuelnih radova iznad same kuće?

**Vinka Aletović:** je postavila dva vijećnička pitanja. Prvo je da li je ostala namjera i da li su se stvorili uvjeti za realizaciju Idejnog rješenja prema kojem bi toranj Stare jame ostao kao simbol grada, kao trajni podsjetnik i respekt za rudarski život ovog grada i neraskidivu povezanost rudnika i stanovnika Kakanja, a što je predviđeno Idejnim urbanističkim rješenjem iz 2013. godine? Drugo pitanje je da li su nadležne službe poduzele aktivnosti u rješavanju problema obustave redova vožnje, što bi prouzrokovalo velike poteškoće našim sugrađanima, a u vezi sa najavljenom potpunom obustavom javnog linijskog prijevoza putnika od strane „Mega Travel“ d.o.o. Kakanj?

**Armin Bašić:** je postavio vijećničko pitanje u kojoj fazi se nalazi priprema rekonstrukcije i saniranje kraka koji se odvaja od ulice Vinski put u pravcu auto puta V-c, obzirom da već godinama mještani imaju probleme tokom kišnih perioda kada je pristup ovim putem potpuno onemogućen?

**Općinski načelnik:** je u vezi postavljenog pitanja oko najavljene obustave redova vožnje rekao da je on sa saradnicima u skladu sa Zaključkom Kolegija Vijeća pristupio pripremanju prijedlog, koji bi se trebao naći na sljedećoj sjednici Vijeća, za rješavanje prevoza na lokalnim linijama. Istim bi se trebalo riješiti pitanje sufinansiranja prevoza na lokalnim linijama, te je najavio razgovore sa prevoznikom kako bi se iznašlo odgovarajuće rješenje. U vezi pitanja vijećnika Bašića oko rekonstrukcije puta je rekao da su službe upoznate sa tim problemom, odnosno da je ta dionica puta u dužini cca 160 metara, uz još dvije dionice, delegirana od strane MZ za rekonstrukciju, te da će uskoro biti raspisan javni poziv za izvođenje radova na rekonstrukciji tih puteva.

Predsjedavajući je konstatovao da je vijećnik Fakir Ajdinović postavio vijećničko pitanje bez korištenja govornice.

**Fakir Ajdinović:** je postavio vijećničko pitanje ko je nadležan da vodi brigu o infrastrukturi na dionici puta od raskršća puteva za MZ Bičer i MZ Dumanac do mjesta „Zli brijeg“, obzirom da navedena dionica pripada MZ Bičer, a istu koristi MZ Dumanac, te je ista postala „ničija zemlja“, jer MZ Bičer nije zainteresovana za rješavanje infrastrukture na predmetnoj dionici?

## **Vijećničke inicijative:**

**Behija Kulović:** je pokrenula dvije vijećničke inicijative. Prva je za uređenje parkinga i zelene površine kod zgrada u Ulici Šehida, jer se radi se o vrlo frekventnoj ulici u kojoj se nalaze tri srednje škole. Veći dio ulice nema trotoar, a za stanare okolnih zgrada problem predstavlja neuređen parking prostor kod zgrade preko puta Gimnazije i neuređena i zapuštena zelena površina iza zgrade. Druga inicijativa se odnosi na izradu i javno objavljivanje plana odvoza zelenog otpada iz prigradskih, seoskih naselja i gradskog područja zbog problema neadekvatnog zbrinjavanja zelenog otpada (ostatka trave, granja, lišća i dr.). Prilikom odvoza smeća, prema ranije utvrđenom rasporedu, dešava se da se zeleni otpad ne odvozi, pa se traži da Vodokom osmisli i izradi precizan plan odvoza zelenog otpada koji će biti objavljen u medijima i na oglasnim pločama u mjesnim zajednicama.

**Edin Aliefendić:** je pokrenuo vijećničku inicijativu za nabavku 5 LED reflektora na poligonu Lječevići u MZ Bjelavići, obzirom da trenutna rasvjeta poligona je dotrajala i „klasične“ sijalice nisu dugotrajne, te troše puno veću električnu energiju.

**Armin Bašić:** je pokrenuo vijećničku inicijativu da se nađe adekvatno i propisno rješenje za odlaganje animalnog otpada tokom predstojećeg i svakog sljedećeg blagdana Kurban bajrama obzirom da isti nastupa tokom ljetnih mjeseci i veliki problem mještanima svih mjesnih zajednica predstavlja animalni otpad nakon klanja kurbana, što zbog potencijalnih infekcija i zagađenja voda, to zbog neugodnih mirisa i prizora.

**Vinka Aletović:** je pokrenula dvije vijećničke inicijative. Prva je za izmjenu tarife (naknada) iz tarifnog broja 7. za izdavanje odobrenja za građenje. U izvodu iz tarifnika broj 7. za izdavanje odobrenja za građenje nisu navedeni vikend objekti kao posebna građevina, što predstavlja nedostatak i stvara zabunu kod podnosioca zahtjeva za izdavanje odobrenja za gradnju. Neophodno je precizirati tarifnik, odnosno uvrstiti sve građevinske objekte, a posebno vikend objekte jer nisu uopšte navedeni. Druga inicijativa je odnosi se na postavljanje zaštitne mreže na poligonu Grbavica na području MZ Varda. Kako je navedeni poligon svega nekoliko metara udaljen od stambenih objekata, zbog nedostatka zaštitne mreže često dolazi do razbijanja prozora na kućama, prljanja fasade, uništavanja ograde, ali i do povreda starijih osoba koje žive u neposrednoj blizini.

**Branko Češljić:** je pokrenuo vijećničku inicijativu da se zamijeni podloga – travnjak na pomoćnom stadionu FK „RUDAR“ Kakanj, kojeg najčešće koriste djeca (maloljetnici) za održavanje svojih treninga.

**Dževdet Huskić:** je pokrenuo dvije vijećničke inicijative. Prva je za pristupanje izradi odluke o utvrđivanju radne sedmice na prostoru općine kojom bi se zabranio rad nedjeljom fizičkih i pravnih osoba iz djelatnosti trgovine, građevinarstva, mesnica, apoteka, pekara, kladionica i benzinskih pumpi, a sve u cilju zaštite građana i građanki jer veliki broj istih radi bez dana odmora po 15 i više dana, sa radom nedjeljom, čak i državnim i vjerskim praznicima. Smatra da je za Kakanj dovoljno osigurati dežurni rad jedne apoteke, benzinske pumpe, pekare i male trgovačke radnje koje bi se mijenjale svake nedjelje po principu rotacije. Druga inicijativa je za popravljivanje i zamjenu svih neispravnih rasvjetnih tijela na prostoru općine Kakanj sa posebnim akcentom na dio ulice Osmana Džafića, ispred zgrade P+2 jer je zbog pitanja u vezi sa popravljivanjem javne rasvjete u toj ulici jedan naš sugrađanin blokiran na FB stranici.

**Fakir Ajdinović:** je pokrenuo vijećničku inicijativu za asfaltiranje parking prostora ispod zgrade JU „Centra za socijalni rad“ Kakanj. Inicijativa je podnosena iz razloga što navedeni parking koriste i stanari zgrade koja se nalazi u neposrednoj blizini, a naročito iz razloga što od početka juna mjeseca počinje sa radom privatno obdanište smješteno u zgradi. Na ovaj način bi se omogućilo roditeljima djece koja borave u obdaništu da na bezbjedan način obavljaju primopredaju djece.

Predsjedavajući je konstatovao da su vijećnici Omer Musić, Mejrema Purušević i Nerma Aliefendić podnijeli vijećničke inicijative bez korištenja govornice.

**Omer Musić:** je pokrenuo dvije vijećničke inicijative. Prva se odnosi na sanaciju dijela puta u Ulici Šehida u dužini od cca 15 metara, tačnije na dionici puta od raskrsnice koja vodi prema naselju Plandište u pravcu Mila, jer je isti dotrajavao i potrebno je izvršiti sanaciju. Druga inicijativa je za sanaciju nekoliko rasvjetnih tijela u Ulici Šehida (put prema Milama) jer na toj dionici rasvjetna tijela već duže vrijeme nisu u funkciji, te bi se zamjenom postojećih rasvjetnih tijela građanima olakšalo kretanje tokom noći.

**Mejrema Purušević:** je pokrenula vijećničku inicijativu da se postave saobraćajna ogledala na lokacijama ulaz i izlaz iz jednosmjerne ulice Rudi Čajavec i ulaz i izlaz iz ulice Patriotske lige. Kako se na pomenute četiri lokacije nalazi tzv. „mrtvi ugao“ smatra da bi postavljanje saobraćajnih ogledala doprinijelo rješavanju problematike i bezbjednijem odvijanju saobraćaja.

**Nerma Aliefendić:** je pokrenula dvije vijećničke inicijative. Prva je da se razmotri mogućnost uklanjanja dijela pruge i sanacija pružnog prelaza u MZ Brežani, obzirom da se rudnička pruga kojom se prevozio ugalj sa pogona „Haljinići“ prema Separaciji već duže vrijeme ne koristi. Potrebno je razmotriti mogućnost da se na samom prelazu preko puta (u blizini džamije Brežani) izvrši demontaža pruge i sanacija pružnog prelaza zbog trenutnog otežanog i usporenog saobraćaj. Druga inicijativa odnosi se na postavljanje saobraćajnog ogledala na raskrsnici puteva kod džamije u naselju Pope.

### **Utvrđivanje dnevnog reda:**

Predsjedavajući je za 18. redovnu sjednicu predložio dnevni red koji je usaglašen na sjednici Kolegija uz napomenu da je predlagač odlučio da povuče sa dnevnog reda tačku 10. „Razmatranje Izvještaja o radu JU Centra za socijalni rad sa Finansijskim izvještajem za 2021. godinu“, tako da dnevni red za 18. sjednicu Vijeća sadrži 15. tačaka.

U diskusiji o dnevnom redu nije niko učestvovao i isti je usvojen jednoglasno sa 24 glasa ZA.

### **Usvojeni dnevni red:**

1. Prijedlog strategije razvoja općine Kakanj za period 2021-2027. godina
2. Prijedlog odluke o izmjenama i dopunama Odluke o općinskim taksama na istaknutu firmu
3. Razmatranje Izvještaja o izvršenju Budžeta Općine Kakanj za 01.01-31.03.2022. godine
4. Informacija o postupku diobe nekretnina (autobuska stanica)
5. Prijedlog zaključka o davanju saglasnosti na Odluku o utvrđivanju osnovice za obračun plaća zaposlenika u JU „KSC“ Kakanj
6. Razmatranje Izvještaja o poslovanju JP „Grijanje“ d.o.o. Kakanj za 2021. godinu
7. Razmatranje Izvještaja o poslovanju JP „Vodokom“ d.o.o. Kakanj za 2021. godinu
8. Razmatranje Finansijskog izvještaja JU za predškolski odgoj i obrazovanje „Mladost“ Kakanj za period 01.01-31.12.2021. godine
9. Prijedlog zaključka o davanju saglasnosti na Odluku o izboru i imenovanju direktora JU za predškolski odgoj i obrazovanje „Mladost“ Kakanj
10. Razmatranje Programa rada JU Centra za socijalni rad sa Finansijskim planom za 2022. godinu
11. Prijedlog rješenja o konačnom imenovanju člana Skupštine JP „Vodokom“ d.o.o. Kakanj
12. Prijedlog odluke o izdvajanju naselja Popržena Gora iz sastava MZ Podgora i osnivanju mjesne zajednice Popržena Gora
13. Prijedlog odluke o raspisivanju i održavanju izbora za članove savjeta u MZ Popržena Gora
14. Prijedlog rješenja o imenovanju Komisije za provođenje izbora u MZ Popržena Gora
15. Razmatranje Inicijative građana podružnica Hrastovac i Slivanj za osnivanje MZ Hrastovac

### **1. Prijedlog strategije razvoja općine Kakanj za period 2021-2027. godina**

**Predlagač:** općinski načelnik

**Obradivač:** Općinski razvojni tim

**Izjavitelj:** Fadil Merdić, koordinator Općinskog razvojnog tima

U diskusiji su učestvovali: Behija Kulović, Dževdet Huskić, Safet Šahman i Branko Češljčić.

**Behija Kulović:** je kazala da je strategija razvoja općine uz budžet najvažniji dokument u jednoj lokalnoj zajednici. Napomenula je da je bila član sektorske grupe za obrazovanje i da su ORT-u dostavljeni traženi podaci, a ona je osim toga dostavila i dodatno svoje prijedloge koji nisu uvršteni u strategiju za koje smatra da su važni. U tom kontekstu je spomenula da strategija ne sadrži segment obrazovanja odraslih i prakvalifikaciju kadrova, navodeći primjer općine Tešanj koja ima formiran Centar za obrazovanje odraslih pri čemu ostvaruje saradnju sa preko 30 lokalnih firmi u cilju realizacije svojih projekata. Također, smatra da se u strategiji trebala pažnja posvetiti dualnom obrazovanju (obezbjeđenje praktične nastave uz učenje u školama), zatim međunarodna saradnja sa školama, kao i kultura sjećanja, te je podsjetila da su ranije bile redovno organizovane posjete učenika stratištima širom BiH. Uz to je kazala da je iznenađena činjenicom da je malo pažnje posvećeno kulturi, kao i da smatra da je neko iz JU „Gradsaka biblioteka“ trebao biti član Općinskog razvojnog tima.

**Dževdet Huskić:** je rekao da je prepoznao da je u izradi predmetnog dokumenta uložen veliki trud, te je čestitao na tome, ali da je naglasio da je evidentno da se i dalje živi u slikama koje nisu identične stvarnom životu, što karakterizira cjelokupnu BiH politiku. Istakao je da je malo pažnje posvećeno problematici zaštite okoliša, naročiti kada je riječ o slivu rijeke Trstionice, pri čemu se spominje uspostava šireg zaštićenog područja sliva rijeke Trstionice i mogućnost zaštite kulturno-istorijskog i prirodnog naslijeđa, te razvoj turizma na tom području. Istovremeno s tim se izvode radovi u gornjem toku Trstionice koji jasno ukazuju da Trstionica za pet godina sigurno neće biti takva kakva je trenutno, odnosno kako piše u strategiji, a u što su se mogli uvjeriti svi prilikom nedavne posjete firmi koja izvodi radove na tom području.

**Safet Šahman:** je čestitao svima koji su učestvovali u izradi strategije i kazao da se prvi put sreo sa dokumentom u koji je uložen toliki trud i koji sadrži ogroman broj podataka, pokazatelja i mjera za budući period. Smatra da je s razlogom značajan prostor posvećen poljoprivredi na kojem polju je evidentno ostvaren napredak, zašto smatra da u velikoj mjeri zasluge idu općinskim poticajima. Imajući u vidu predmetni dokument uvjeren je da će se i dalje ići u pravcu razvoja i unapređenja poljoprivrede.

**Branko Češljic:** je upozorio na slab prirodni priraštaj i demografsku katastrofu koja prijete cijeloj BiH, pa tako i općini Kakanj. Smatra da će gradska područja u budućnosti naseljena, ali je ocijenio zabrinjavajućim da izumire život u ruralnim dijelovima, posebno u naseljima u slivu rijeke Trstionice. Rekao je da niti jedna strategija ne govori o mjerama za povećanje prirodnog priraštaja, a mnogo je faktora koji utiču na to. Na kraju je rekao da planirani razvoj turizma na području sliva Trstionice nema smisla bez stanovništva (ljudi) koji su tu živili desetljećima.

**Fadil Merdić (odgovor):** se zahvalio svima na pohvalama i čestitkama za uloženi trud u izradi strategije i izrazio žaljenje što podaci i prijedlozi vijećnice Kulović nisu uvršteni u strategiju, te je rekao da će se nastojati kroz buduće akcione planove to uvrstiti naknadno. U vezi primjedbe da se malo pažnje posvetilo kulturi je rekao da je uvršeno ono što je dostavljeno od koordinatora te sektorske grupe i pojasnio da je direktor Gradske biblioteke bio član sektorke grupe za kulturu, te je mogao sve što smatra bitnim dostaviti koordinatorskom odboru radi uvrštavanja u strategiju. Na kraju je rekao da prijedlozi i inicijative izneseni u toku diskusije će biti uzeti u obzir prilikom izrade akcionih planova.

Nakon diskusije Vijeće je usvojilo Strategiju razvoja općine Kakanj za period 2021-2027. godina, jednoglasno sa 24 glasa ZA.

## **2. Prijedlog odluke o izmjenama i dopunama Odluke o općinskim taksama na istaknutu firmu**

**Predlagač:** općinski načelnik

**Obrađivač:** Služba za privredu, urbanizam i zaštitu okoline

**Izviestilac:** Mirza Fazlić, pomoćnik općinskog načelnika

U diskusiji nije niko učestvovao i Vijeće je jednoglasno sa 25 glasova ZA usvojilo Odluku o izmjenama i dopunama Odluke o općinskim taksama na istaknutu firmu.

### **3. Razmatranje Izvještaja o izvršenju Budžeta Općine Kakanj za 01.01-31.03.2022. godine**

**Predlagač:** općinski načelnik

**Obrađivač:** Služba za finansije

**Izjavitelj:** Džihad Berbić, pomoćnik općinskog načelnika

U diskusiji nije niko učestvovao i Vijeće je Zaključak o prihvatanju Izvještaja o izvršenju Budžeta Općine Kakanj za 01.01-31.03.2022. godine, sa 16 glasova ZA, bez glasova PROTIV i 6 glasova UZDRŽAN.

### **4. Informacija o postupku diobe nekretnina (autobuska stanica)**

**Predlagač:** Općinsko pravobranilaštvo

**Obrađivač:** Općinsko pravobranilaštvo

**Izjavitelj:** Vesna Ajanović, općinska pravobraniteljica

U diskusiji je učestvovao Dževdet Huskić.

**Dževdet Huskić:** je u ime kluba NS iznio stav da bi Općina Kakanj po svaku cijenu trebala nastojati da kupi dijelove autobuske stanice koji nisu u njenom vlasništvu i da tek nakon što se iscrpe sve mogućnosti u tom pravcu se mogu razmatrati druge opcije diobe predmetne nekretnine.

**Općinski načelnik:** je predložio da se napravi pauza u radu Vijeća kako bi predsjednici klubova u Vijeću zajedno sa općinskom pravobraniteljicom i sa njim razmotrili raspoložive mogućnosti, te kako bi se nakon toga predložili odgovarajući zaključci.

Predsjedavajući je dao pauza od 10 minuta.

**Vesna Ajanović:** je pročitala usaglašen zaključak prema kojem se zadužuje Općinsko pravobranilaštvo da o pravosnažnoj odluci o diobi nekretnine informiše Općinsko vijeće i općinskog načelnika, a da općinski načelnik po dobivenoj informaciji dostavi Vijeću prijedlog odluke o diobi nekretnine.

Nakon diskusije Vijeće je jednoglasno sa 23 glasa ZA usvojilo Zaključak o primanju k znanju Informacije o postupku diobe nekretnina (autobuska stanica) kojim se zadužuje Općinsko pravobranilaštvo da o pravosnažnoj odluci o diobi nekretnine informiše Općinsko vijeće i općinskog načelnika, a da općinski načelnik po dobivenoj informaciji dostavi Vijeću prijedlog odluke o diobi nekretnine.

### **5. Prijedlog zaključka o davanju saglasnosti na Odluku o utvrđivanju osnovice za obračun plaća zaposlenika u JU „KSC“ Kakanj**

**Predlagač:** UO JU Kulturno-sportski centar Kakanj

**Obrađivač:** UO JU Kulturno-sportski centar Kakanj

**Izjavitelj:** Nihad Tukić, predsjednik UO i Mirza Mušija, direktor JU „KSC“ Kakanj

U diskusiji su učestvovali: Behija Kulović i Fakir Ajdinović.

**Behija Kulović:** je kazala da će klub NS podržati Odluku o utvrđivanju osnovice za obračun plaća u JU KSC jer to vodi poboljšanju standarda radnika. Uz to je naglasila da su plaće u JU „Gradska biblioteka“ veoma male, te je podsjetila da je na prethodnoj sjednici dala saglasnost na novi Pravilnik o koeficijentima i platnim razredima u JU „Mladost“ i kazala da bi za povećanje plaće u Gradskoj biblioteci za 10% trebalo izdvojiti 11 hiljada KM. Smatra da to se ta sredstva u Budžetu Općine mogu obezbjediti, iako je svjesna činjenice da, prema aktima Ustanove, ZDK sufinansira plaće i naknade radnika JU „Gradska biblioteka“ Kakanj. U tom smislu je predložila zaključak da se prilikom izrade narednog rebalansa Budžeta Općine obezbjede sredstva za povećanje plaće radnika JU „Gradska biblioteka“ Kakanj za 10%.

**Fakir Ajdinović:** je podsjetio da su od 2009. godine, plaće i koeficijenti radnika JU Centar za socijalni rad Kakanj ne promjenjeni, te je izrazio nadu da će se u narednom rebalansu Budžeta voditi računa o toj činjenici.

**Općinski načelnik:** je pozvao vijećnike da diskutuje o tačci dnevnog reda, a da se pitanje plaća u javnim ustanovama rješava pred organima i na mjestima gdje je to propisano, kojom prilikom bi se utvrdilo koliko iznose prosječne plaće u tim ustanovama.

Nakon diskusije Vijeće je jednoglasno sa 25 glasova ZA usvojilo Zaključak o davanju saglasnosti na Odluku o utvrđivanju osnovice za obračun plaća zaposlenika u JU „KSC“ Kakanj, dok zaključak predložen od vijećnice Kulović nije dobio potrebnu većinu sa 9 glasova ZA, bez glasova PROTIV i 11 glasova UZDRŽAN.

## **6. Razmatranje Izvještaja o poslovanju JP „Grijanje“ d.o.o. Kakanj za 2021. godinu**

**Predlagač:** Skupština JP „Grijanje“ d.o.o. Kakanj

**Obrađivač:** Skupština JP „Grijanje“ d.o.o. Kakanj

**Izjestilac:** Muamer Čelebić, direktor JP „Grijanje“ d.o.o. Kakanj

U diskusiji nije niko učestvovao i Vijeće je usvojilo Zaključak prihvatanju Izvještaja o poslovanju JP „Grijanje“ d.o.o. Kakanj za 2021. godinu, sa 21 glasom ZA, bez glasova PROTIV i 3 glasa UZDRŽAN.

## **7. Razmatranje Izvještaja o poslovanju JP „Vodokom“ d.o.o. Kakanj za 2021. godinu**

**Predlagač:** Skupština JP „Vodokom“ d.o.o. Kakanj

**Obrađivač:** Skupština JP „Vodokom“ d.o.o. Kakanj

**Izjestilac:** Haris Veispahić, direktor JP „Vodokom“ d.o.o. Kakanj

U diskusiji su učestvovali: Mujo Fafulić, Vinka Aletović i Edin Aliefendić.

**Mujo Fafulić:** je pohvalio Izvještaj i obrazloženje izneseno od strane direktora.

**Vinka Aletović:** je Izvještaj ocijenila kao stručan, jasan i obiman. Pozvala je menadžment da uloži dodatne napore da se u narednom periodu obezbijedi linearno povećanje plaća radnika u JP kako bi se svačiji rad vrednovao na pravi način. Istakla je problem sa vodosnabdijevanjem u naselju Bare gdje pojedini mještani imaju višegodišnji problem sa nedostatkom vode ili slabog pritiska, pa je u tom smislu pozvala da se iznađe rješenje problema kroz ugradnju pumpi većeg kapaciteta ili izgradnju novog rezervoara ili na neki treći način. Na kraju je napomenula i problem priklupljanja smeća, odnosno način na koji se to radi, što je ocijenila neprihvatljivim za 21. vijek, te je pozvala na unapređenja tog sistema na način da se obezbijede kante za odlaganje otpada sa logom firme ili ugradnja pozdernih kontejnera na području cijele općine i slično.

**Edin Aliefendić:** je u fokus aktivnosti JP „Vodokom“ stavio zaštitu vodozahvata Bukovica, a u smislu radova i aktivnosti koje se trenutno izvode na tom području. U tom pravcu je predložio zaključak da se Općinsko vijeće u cilju zaštite i osiguranja kontinuiranog javnog vodosnabdjevanja stanovnika općine Kakanj pitkom vodom iz javnog vodovodnog sistema, a što je u općem javnom ineteresu svih građana, izjasni: Podržavaju se dosadašnje aktivnosti JP „Vodokom“ na zaštiti vodozahvata Bukovica i vodozaštitnih zona jer je to od općeg javnog interesa; traži se od društva „Eastern Mining“ d.o.o. Vareš da vrši mjesečne analize vode Borovičkog potoka na teške metale u skladu sa Pravilnikom o zdravstvenoj ispravnosti vode za piće, te rezultate analiza dostavlja operateru javnog vodosnabdjevanja na području općine Kakanj JP „Vodokom“. Uzorkovanje i analizu trebaju vršiti ovlaštena i akreditovana društva za obavljanje ovih vrsta poslova (od strane Instituta za akreditiranje BiH – BATA), a sve u cilju ispravnog praćenja kvalitativnog i kvantitativnog stanja pritoka rijeke Bukovice; traži se od društva „Eastern Mining“ d.o.o. Vareš da vrši mjesečne analize i mjerenja protoka vode od Borovičkog potoka do ulijevanja u Bukovicu, te rezultate mjerenja dostavlja operateru javnog vodosnabdjevanja na području općine Kakanj JP „Vodokom“; traži se od društva „Eastern Mining“ d.o.o. Vareš da operateru javnog vodosnabdjevanja na području općine Kakanj JP „Vodokom“ dostavi rezultate dodatnih hidrogeoloških ispitivanja (bojenja vode) u bušotinama koja su rađena u proteklom periodu.

Nakon diskusije Vijeće je usvojilo Zaključak o prihvatanju Izvještaja o poslovanju JP „Vodokom“ d.o.o. Kakanj za 2021. godinu, sa 20 glasova ZA, 1 glas PROTIV i 4 glasa UZDRŽAN, te je sa 21 glasom ZA, bez glasova PROTIV i 3 glasa UZDRŽAN usvojen Zaključak kojim se podržavaju dosadašnje aktivnosti

JP „Vodokom“ na zaštiti vodozahvata Bukovica i vodozaštitnih zona jer je to od općeg javnog interesa. Traži se od društva „Eastern Mining“ d.o.o. Vareš da vrši mjesečne analize vode Borovičkog potoka na teške metale u skladu sa Pravilnikom o zdravstvenoj ispravnosti vode za piće, te rezultate analiza dostavlja operateru javnog vodosnabdjevanja na području općine Kakanj JP „Vodokom“. Uzorkovanje i analizu trebaju vršiti ovlaštena i akreditovana društva za obavljanje ovih vrsta poslova (od strane Instituta za akreditiranje BiH – BATA), a sve u cilju ispravnog praćenja kvalitativnog i kvantitativnog stanja pritoka rijeke Bukovice. Traži se od društva „Eastern Mining“ d.o.o. Vareš da vrši mjesečne analize i mjerenja protoka vode od Borovičkog potoka do ulijevanja u Bukovicu, te rezultate mjerenja dostavlja operateru javnog vodosnabdjevanja na području općine Kakanj JP „Vodokom“. Traži se od društva „Eastern Mining“ d.o.o. Vareš da operateru javnog vodosnabdjevanja na području općine Kakanj JP „Vodokom“ dostavi rezultate dodatnih hidrogeoloških ispitivanja (bojenja vode) u bušotinama koja su rađena u proteklom periodu.

## **8. Razmatranje Finansijskog izvještaja JU za predškolski odgoj i obrazovanje „Mladost“ Kakanj za period 01.01-31.12.2021. godine**

**Predlagač:** UO JU za predškolski odgoj i obrazovanje „Mladost“ Kakanj

**Obrađivač:** UO JU za predškolski odgoj i obrazovanje „Mladost“ Kakanj

**Izjavitelj:** Mirsada Čaluk, predsjednica UO i Helmina Murtić, direktorica JU za predškolski odgoj i obrazovanje „Mladost“ Kakanj

U diskusiji je učestvovao Mujo Fafulić.

**Mujo Fafulić:** je rekao da će podržati predmetni izvještaj, te je sugerisao da bude praksa prilikom usvajanja izvještaja da direktori JU i JP izađu za govornicu i ukratko iznesu obrazloženje, odnosno daju uvodno izlaganje o izvještaju, a sve iz razloga pristojnosti prema građanima i vijećnicima.

Nakon diskusije Vijeće je usvojilo Zaključak o prihvatanju Finansijskog izvještaja JU za predškolski odgoj i obrazovanje „Mladost“ Kakanj za period 01.01-31.12.2021. godine, sa 17 glasova ZA, bez glasova PROTIV i 7 glasova UZDRŽAN.

## **9. Prijedlog zaključka o davanju saglasnosti na Odluku o izboru i imenovanju direktora JU za predškolski odgoj i obrazovanje „Mladost“ Kakanj**

**Predlagač:** UO JU za predškolski odgoj i obrazovanje „Mladost“ Kakanj

**Izjavitelj:** Mirsada Čaluk, predsjednica UO i Helmina Murtić, direktorica JU za predškolski odgoj i obrazovanje „Mladost“ Kakanj

U diskusiji nije niko učestvovao i Vijeće je usvojilo Zaključak o davanju saglasnosti na Odluku o izboru Azre Čišija za direktoricu JU za predškolski odgoj i obrazovanje „Mladost“ Kakanj, sa 16 glasova ZA, bez glasova PROTIV i 8 glasova UZDRŽAN.

## **10. Razmatranje Programa rada JU Centra za socijalni rad sa Finansijskim planom za 2022. godinu**

**Predlagač:** UO JU Centar za socijalni rad Kakanj

**Obrađivač:** UO JU Centar za socijalni rad Kakanj

**Izjavitelj:** Samir Husika, član UO i Fakir Ajdinović, direktor JU Centar za socijalni rad Kakanj

U diskusiji nije niko učestvovao i Vijeće je usvojilo Zaključak o davanju saglasnosti na Program rada JU Centra za socijalni rad sa Finansijskim planom za 2022. godinu, sa 17 glasa ZA, bez glasova PROTIV i 8 glasova UZDRŽAN.

## **11. Prijedlog rješenja o konačnom imenovanju člana Skupštine JP „Vodokom“ d.o.o. Kakanj**

**Predlagač:** Komisija za izbor u regulirane organe

**Obrađivač:** Stručna služba za poslove Općinskog vijeća

**Izjavitelj:** Muamer Mandra, predsjednik Komisije

U diskusiji nije niko učestvovao i Vijeće je usvojilo Rješenje o imenovanju Emira Ibrahimspahića za člana Skupštine JP „Vodokom“ d.o.o. Kakanj, sa 16 glasa ZA, bez glasova PROTIV i 9 glasova UZDRŽAN.

## **12. Prijedlog odluke o izdvajanju naselja Popržena Gora iz sastava MZ Podgora i osnivanju mjesne zajednice Popržena Gora**

**Predlagač:** općinski načelnik

**Obradivač:** Služba za opću upravu, radne i zajedničke poslove, lokalnu samoupravu i mjesne zajednice

**Izjavitelj:** Bahrudin Arnaut, pomoćnik općinskog načelnika

U diskusiji nije niko učestvovao i Vijeće je jednoglasno sa 22 glasa ZA usvojilo Odluku o izdvajanju naselja Popržena Gora iz sastava MZ Podgora i osnivanju mjesne zajednice Popržena Gora.

Predsjedavajući je predložio da se objedini rasprava po tačkama 13. i 14. dnevnog reda, a da se glasanje obavi pojedinačno.

## **13. Prijedlog odluke o raspisivanju i održavanju izbora za članove savjeta u MZ Popržena Gora**

## **14. Prijedlog rješenja o imenovanju Komisije za provođenje izbora u MZ Popržena Gora**

**Predlagač:** općinski načelnik

**Obradivač:** Služba za opću upravu, radne i zajedničke poslove, lokalnu samoupravu i mjesne zajednice

**Izjavitelj:** Bahrudin Arnaut, pomoćnik općinskog načelnika

**Bahrudin Arnaut:** je predložio Komisiju za provođenje izbora u MZ Popržena Gora u sastavu: predsjednik Behrudin Arnaut, članovi Sedin Karahodžić i Avdo Kovač.

U diskusiji nije niko učestvovao i Vijeće je jednoglasno sa 24 glasa ZA usvojilo Odluku o raspisivanju i održavanju izbora za članove savjeta u MZ Popržena Gora, te je sa 22 glasa ZA, bez glasova PROTIV i 1 glas UZDRŽAN usvojeno Rješenje o imenovanju Komisije za provođenje izbora u MZ Popržena Gora u sastavu: predsjednik Behrudin Arnaut, članovi Sedin Karahodžić i Avdo Kovač.

## **15. Razmatranje Inicijative građana podružnica Hrastovac i Slivanj za osnivanje MZ Hrastovac**

**Predlagač:** općinski načelnik

**Obradivač:** Služba za opću upravu, radne i zajedničke poslove, lokalnu samoupravu i mjesne zajednice

**Izjavitelj:** Bahrudin Arnaut, pomoćnik općinskog načelnika

U diskusiji nije niko učestvovao i Vijeće je jednoglasno sa 22 glasa ZA usvojilo Zaključak o prihvatanju Inicijative građana podružnice Hrastovac i Slivanj za osnivanje MZ Hrastovac.

Predsjedavajući je zaključio rad 18. redovne sjednice Općinskog vijeća u 12:25 sati.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog Zapisnika.

**SEKRETAR  
OPĆINSKOG VIJEĆA  
Ferdo Mijač**

**PREDSJEDAVAJUĆI  
OPĆINSKOG VIJEĆA  
Slaven Katičić**